

Pisortani Digitalimik Allakkerinermiit inatsisit naapertorlugit ingerlatsiviit il. il. pisussaajunnaarsinnissaannut Namminersorlutik Oqartussat nalunaarutaat

Pisortani Digitalimik Allakkerineq pillugu Inatsisartut inatsisaat nr. 14, 8. juni 2017-imeersoq § 10, imm. 1 aamma imm. 2, § 11, imm. 2 aamma § 17, imm. 2 aamma 3 naapertorlugit aalajangersarneqarpoq:

Kapitali 1

Inatsisit naapertorlugit ingerlatsivinnik pisussaajunnaarsitsineq

Pisussaajunnaarsitsinissamut qinnuteqarneq

§ 1. Inatsisit naapertorlugit ingerlatsiviit Qitiusumik Suliffeqarfinnik Nalunaarsuiffimmi (CVR) nalunaarsorneqarsimasut, Kalaallit Nunaanni angerlarsimaffillit Pisortani Digitalimik Allakkerivimmut ilanngunnissamit pisussaajunnaarsinneqarsinnaapput.

Imm. 2. Inatsisit naapertorlugit ingerlatsivik Pisortani Digitalimik Allakkerinermut ilanngunnissamit pisussaajunnaarsitsinissamut qinnuteqarsinnaavoq, pissutsit immikkut ittut kingunerisaannik inatsisit naapertorlugit ingerlatsivik digitalimik allagarsianik tiguisinnaanngikkuni.

Imm. 3. Qinnuteqartup atugaasa sukumiisumik naliliiffigineri tunngavigalugit qinnuteqaat naliliiffigineqassaaq, matumani qinnuteqartoq qarasaasiakkut attaveqarnissamut periarfissaqannginnersoq.

§ 2. Pisussaajunnaarsitsinissamut tunngavilersuut aamma pisussaajunnaarsitsinissamut peqqutaasunut uppersaasat ilanngullugit qinnuteqaammi imarineqassapput.

Imm. 2. Qinnuteqaat inatsisit naapertorlugit ingerlatsivimmi atsiorsinnaatitaasumit atsiorneqarsimassaaq.

Imm. 3. Qinnuteqaat Digitalimik Sullissinermut Aqutsisoqarfinnut nassiunneqassaaq.

Imm. 4. Pisussaajunnaarsitsinissamut qinnuteqaat digitalimik sullissivik.gl aqqutigalugu tunniunneqarsinnaavoq. Qinnuteqaat digitalimik nassiunneqarpat, atsiorsinnaatitaasup nammineq atsiornermik digitaliusumik kinaassutsini uppersaasavaa.

§ 3. Atsiorsinnaatitaasup kinaassutsimut uppersaasatip assitallip atuuttup assilinera ilanngullugu nassiutissavaa. Kinaassutsimut uppersaasatip assitallit atuuttut makkuupput:

- 1) Biilernermut allagartaq nunami EU/EØS-imi, Kalaallit Nunaanni imaluunniit Savalimmiuni atulersinneqarsimasoq.
- 2) Pas-i inuup pineqartup nunagisaani pisortatut oqartussaasuni atulersinneqarsimasoq.
- 3) Forsvaret-ip kinaassutsimut uppersaataa Danmarkimi atulersinneqarsimasoq.
- 4) NATO-pas-i.
- 5) Politiit kinaassutsimut uppersaataa Danmarkimi atulersinneqarsimasoq.
- 6) Najugaqarnissamik akuersissut imaluunniit najugaqarnissamik allagartaq assitalik Danmarkimi atulersinneqarsimasoq.
- 7) Danskit aningaaseriviani kinaassutsimut uppersaataa.
- 8) Nuna tamakkerlugu kinaassutsimut uppersaata assitalik pineqartup nunaani pisortatut oqartussaaffeqarfinni atulersinneqarsimasoq, aamma nunani Schengenimi angalanermi uppersaatatut atorineqarsinnaasoq.

Imm. 2. Atsiorsinnaatitaasup assitut uppersaatatut atorniakkami, inuttaata normua takuneqarsinnaanngippat, kinaassutsimut uppersaataip assitalit saniatigut kinaassutsimut uppersaata alla takutinneqassaaq, tassanilu atsiorsinnaatitaasup inuttut normua takuneqarsinnaassaaq.

Imm. 3. Kinaassutsimut uppersaata assitalik takutissinnaanngikkaanni, kinaassutsimut uppersaatait allat marluk nassarneqassapput, taakkunanilu aappaani atsiorsinnaatitaasup inuttut normua takuneqarsinnaassaaq. Kinaassutsimut uppersaata tassaasinnaavoq:

- 1) Najugaqarnermut uppersaata.
- 2) Kuisinnermut allagartaq imaluunniit atinut uppersaata.
- 3) Akileraartarnermut Aqutsisoqarfimmiit ukiumut ukiumoortumik nalunaarusiaq kingulleq imaluunniit siumoortumik nalunaarusiaq.
- 4) Pisortanit ikiorsiissutinik pisartagaqarnermut uppersaata nutaannginneq qaammatini pingasuni pisoqaassuseqassaaq.

Pisinnaatitsinikkut pisussaajunnaarsitsinissamut qinntueqarneq

§ 4. Inatsisit naapertorlugit ingerlatsivik (pisinnaatitsisoq) sinnerlugu pisussaajunnaarsitsinissamut qinnuteqaammik pisinnaatinneqartup tunniussineratigut Pisortani Digitalimik Allakkerinnermut ilanngunnissamut pisussaajunnaarsitsinissamut inatsisit naapertorlugit ingerlatsivik qinnuteqarsinnaavoq. Pisinnaatitsissut pisinnaatitsisumit inatsisit naapertorlugit ingerlatsivimmi atsiorsinnaatitaasumit atsiorneqarsimassaaq.

Imm. 2. Pisinnaatinneqartup kinaassutsimut uppersaataata atuuttup assilineri ilanngussimassavaa, tak. § 3.

Imm. 3. Pisussaajunnaarsitsinissamut qinnuteqaat pisinnaatitsinermullu allagaqaat pisinnaatinneqartup Digitalimik Sullissinnermut Aqutsisoqarfinnut nassiutissavaa.

Imm. 4. Pisussaajunnaarsitsinissamut qinnuteqaat digitalimik sullissivik.gl aqqutigalugu tunniunneqarsinnaavoq. Qinnuteqaat digitalimik nassiunneqarpat, atsiorsinnaatitaasup nammineq atsiornermik digitaliusumik kinaassutsini uppersaassavaa. Pisinnaatinneqartoq inatsisit naapertorlugit ingerlatsiviuppat, inatsisit naapertorlugit ingerlatsiviup sulisuata atsiornermik digitaliusumik kinaassutsini uppersaassavaa.

Kapitali 2

*Inuussutissarsiuteqarneq pillugu attaveqaqatigiinnermut atatillugu inunnik ataasiakkaanik
pisussaajunnaarsitsineq*

Pisortani Digitalimik Allakkerinnermut ilanngunnissamit pisussaajunnaarsitsinissamut qinnuteqarneq

§ 5. Pissutsit immikkut ittut kingunerisaannik inuit ataasiakkaat allakkerinnermut aqqissuussineq aqqutigalugu allagarsisinnaanngikkunik, inuussutissarsiuteqarneq pillugu attaveqaqatigiinnermut atatillugu Pisortani Digitalimik Allakkerinnermut ilanngunnissamit inuit ataasiakkaat pisussaajunnaarsitsinissamut qinnuteqarsinnaapput.

Imm. 2. Qinnuteqartup atugaasa sukumiisumik naliliiffigineri tunngavigalugit qinnuteqaat naliliiffigineqassaaq, matumani qinnuteqartoq qarasaasiakkut attaveqarnissamut periarfissaqannginnersoq.

Imm. 3. Pisussaajunnaarsitsinissamut tunngavilersuut aamma pisussaajunnaarsitsinissamut peqqutaasunut uppersaasat ilanngullugit qinnuteqaammik imarineqassapput.

Imm. 4. Qinnuteqarneq inuttut ataasiakkaatut atukkanik tunngavilersorneqarpat, Pisortani Digitalimik Allakkerinnermut ilanngunnermit pisussaajunnaarsitsineq pillugu Nalunaarusiaq malillugu pisussaajunnaarsitsinerup assilinera qinnuteqaammut ilanngunneqassaaq.

Imm. 5. Qinnuteqaat Digitalimik Sullissinnermut Aqutsisoqarfimmut nassiunneqassaaq.

Pisinnaatitsinikkut pisussaajunnaarsitsinissamut qinnuteqarneq

§ 6. Inuit ataasiakkaat (pisinnaatitsisoq) sinnerlugit pisussaajunnaarsitsinissamut qinnuteqaammik pisinnaatinneqartup tunniussineratigut Pisortani Digitalimik Allakkerinnermut ilanngunnissamut pisussaajunnaarsitsinissamut inuit ataasiakkaat ilanngussaq 1-imi immersuiffissaq atorlugu qinnuteqarsinnaapput. Immersorsimasaq pisinnaatitsisumit atsiorneqarsimassaaq, matumani pisinnaatitsinnermut uppersaasat immersugassamiittoq pisinnaatitsisumit atsiornera ilanngullugu.

Imm. 2. Pisussaajunnaarsitsinnermut qinnuteqaat pisinnaatinneqartup Digitalimik Sullissinnermut Aqutsisoqarfimmut nassiutissavaa.

Imm. 3. Pisussaajunnaarsitsinissamut qinnuteqaat digitalimik sullissivik.gl aqqutigalugu tunniunneqarsinnaavoq. Qinnuteqaat digitalimik nassiunneqarpat, pisinnaatinneqartup nammineq atsiornermik digitaliusumik kinaassutsini uppersaassavaa. Pisinnaatinneqartoq inatsisit naapertorlugit ingerlatsiviuppat, inatsisit naapertorlugit ingerlatsiviup sulisuata atsiornermik digitaliusumik kinaassutsini uppersaassavaa.

Kapitali 3

Pisussaajunnaarsitsineq pillugu aalajangiineq

§ 7. Qinnuteqaatitut tunniunneqartoq kinaassutsimullu uppersaasatitut nassiunneqartoq tunngavigalugit Pisortani Digitalimik Allakkerinnermut ilanngunnermit pisussaajunnaarsitsinnermut Digitalimik Sullissinnermut Aqutsisoqarfik aalajangiissaaq.

Imm. 2. Pisussaajunnaarsitsineq Pisortani Digitalimik Allakkerinermi nalunaarsorneqassaaq. Pisussaajunnaarsitsinerup nalunaarsornera pillugu aalajangiineq qinnuteqartumut imaluunniit taassuma pisinnaatitsisuanut allakkatigut nalunaarutigineqassaaq.

Imm. 3. Pisussaajunnaarsitsinissamut qinnuteqaatit Digitalimik Sullissinermut Aqutsisoqarfiup aalajangiiffigineri allaffissornikkut oqartussanut allanut ingerlateqqinneqarsinnaanngillat.

Imm. 4. Inatsisit naapertorlugit ingerlatsivimmit Kalaallit Nunaanni suliffeqarfeqarunnaarsimasumit, imaluunniit allatut pingaarutilimmik Kalaallit Nunaannut attuumassuteqarunnaarsimasumit, pisussaajunnaarsinneqarnissamik qinnuteqaat tamatigut pisussaajunnaarsinneqarnermik kinguneqartarpoq.

Pisussaajunnaarsitsinerup sivilissusia

§ 8. Pisortani Digitalimik Allakkerinermut ilanngunnermit pisussaajunnaarsitsineq ulloq nalunaarsorfigisaaniit atuutilissaaq pisussaajunnaarsitsinerullu aalajangiiffigineranit ukiup qaammatisiutip tulliani 1. november atuukkunnaassaaq, taamaattoq tak. imm. 2.

Imm. 2. Pisussaajunnaarsitsinermut tunngavilersuutaasoq inatsisit naapertorlugit ingerlatsiviup Kalaallit Nunaanni suliffeqarfeqarunnaarsimaneranut tunngappat, inatsisit naapertorlugit ingerlatsivik ataavartussamik pisussaajunnaarsinneqassaaq.

Imm. 3. Pisussaajunnaarsitsineq pillugu aalajangiinerup qaangiunnerata kingorna, tak. imm. 1, inatsisit naapertorlugit ingerlatsivik imaluunniit inuk pineqartoq ullup qaangiuffissaa nallertinnagu pisussaajunnaarsitsineq pillugu nutaamik aalajangiisoqanngippat Pisortani Digitalimik Allakkerinermut ilannguteqqissaaq.

Imm. 4. Pisussaajunnaarsitsinerup ukiumi tassani qaangiunnissaani 1. november sioqqullugu pisussaajunnaarsitsinerup qaangiunnissaa pillugu Digitalimik Sullissinermut Aqutsisoqarfimmit ataasiakkaanut nutaamillu qinnuteqarnissamut periarfissaqarneq nalunaarutigineqassaaq.

Kapitali 4

Allagarsiat ammarneqanngitsut

§ 9. Inatsisit naapertorlugit ingerlatsiviup digitalimik allakkeriviani allagarsiat ammarneqanngitsut amerlassusaasa nalunaarutiginnissai Digitalimik Sullissinermut Aqutsisoqarfimmut noqqaassutigisinnavaai.

Imm. 2. Allagarsianik ammaanermi inatsisit naapertorlugit ingerlatsivimmi pisinnaatinneqartup najuunnissani piumasarisinnaavaa, tak. imm. 1.

Imm. 3. Inatsisit naapertorlugit ingerlatsiviup Digitalimik Sullissinermut Aqutsisoqarfik pisinnaatitsissummik tunerusunngippagu, tak. imm. 1, digitalimik allakkerivimmi allagarsiassat ammarneqanngitsut pillugit Digitalimik Sullissinermut Aqutsisoqarfiup paasititsissutigisinnaanngilai.

Imm. 4. Inatsisit naapertorlugit ingerlatsiviup imaluunniit tassani pisinnaatinneqartup allagarsiassat ammarneqanngitsut kissaatigippagit, allagarsiassat ammarneqanngitsut najukkamut pineqartup ilisimatitsissutigisaanut nassiunneqarnissaat Digitalimik Sullissinermut Aqutsisoqarfiup isumagissavai.

Allagarsiat inatsisit naapertorlugit ingerlatsivinnut inunnullu ataasiakkaanut Pisortani Digitalimik

Allakkerinermut ilanngussimanngitsunut

§ 10. Inatsisit naapertorlugit ingerlatsivik imaluunniit inuk inuussutissarsiuteqarnermini attaveqaqatigiinneq eqqarsaatigalugu pisussaajunnaarsinneqarsimappat imaluunniit Pisortani Digitalimik Allakkerinermut allatigut ilanngussimanngippat, nassiussisup allagarsiat pappialanngorlugit imaluunniit allatigut pineqartumut nassiunneqarnissai isumagissavai.

Kapitali 5

Inunnik Pisortani Digitalimik Allakkerinermut ilanngussimanngitsunik nammineq piumassutsimik ilanngunneq

§ 11. Inatsisit naapertorlugit ingerlatsivik imaluunniit inuk inuussutissarsiuteqarnerminut attaveqaqatigiinneq eqqarsaatigalugu Pisortani Digitalimik Allakkerinermut pinngitsoorani ilanngunnissamut pisussaajunnaarsinneqartoq Pisortani Digitalimik Allakkerinermut atsiorneq digitaliusoq atorlugu iserluni nammineq piumassutsimik ilanngunnermigut ilanngussinnaavoq.

Imm. 2. Ilanngunnermi imm. 1 malillugu pisussaajunnaarsitsineq atorunnaarsinneqassaaq.

Imm. 3. Inatsisit naapertorlugit ingerlatsiviup inuullu inuussutissarsiornermini attaveqaqatigiinneq eqqarsaatigalugu nammineq piumassutsimik ilanngunnermi kingorna pisussaajunnaarsinneqarnissamik kissaateqaruni, pisussaajunnaarsitsinermut qinnuteqaat nutaaq nassiuteqqaassavaa. Qinnuteqaat tunniunneqassaaq taavalu kapitali 1-3-mi malittarisassat malillugit suliarineqassalluni.

Kapitali 6

Inuup allap allakkanik atuarsinnaatinneqarnera

§ 12. Inatsisit naapertorlugit ingerlatsivik inullu inuussutissarsiuteqarnermi attaveqaqatigiinneq eqqarsaatigalugu Pisortani Digitalimik Allakkerinermut ilanngussimasut Digitalimik Sullissinermut Aqutsisoqarfimmut saaffiginnissuteqarnikkut inuit imaluunniit inatsisit naapertorlugit ingerlatsiviit Pisortani Digitalimik Allakkerinermut imaluunniit tassanngaanniit nassiunneqartut atuarsinnaanerani akuersisinnaapput.

Imm. 2. Inuit ataasiakkaat inuussutissarsiuteqarnerminni attaveqaqatigiinneq eqqarsaatigalugu Pisortani Digitalimik Allakkerinermut il. il. ilanngunnermit inunnik pisussaajunnaarsitsineq pillugu Nalunaarusiaq malillugu inuk alla inuttut nalinginnaasutut atuarsinnaanerani pinnaatissinnaavaat.

Imm. 3. Inatsisit naapertorlugit ingerlatsivik allanut pinnaatitsinikkut atuarsinnaatitsiguni, pinnaatitsissut atsiorsinnaatitaasumit atsiorneqarsimassaaq.

Imm. 4. Inatsisit naapertorlugit ingerlatsivik pinnaatitsinermigut Digitalimik Sullissinermut Aqutsisoqarfimmut saaffiginnilluni pinnaatinneqartoq atuarsinnaanermut akuerisinnaavaa. Pinnaatitsisoq sullissivik.gl-imi atuarsinnaanermut qinnuteqassaaq. Pinnaatitsineq qinnuteqarnermi ilanngunneqassaaq inatsisillu naapertorlugit ingerlatsivimmi atsiorsinnaatitaasumit atsiorneqarsimassalluni.

Imm. 5. Eqqartuussissuserisut, kukkunersiuisut allallu suliffeqarfiit inatsisit naapertorlugit ingerlatsivinnik naatsorsuutitigut allaffissornikkullu suliatigut sullissinissamik siunertaqartut sullitamik sinnerlugit sullitami digitalimik allakkeriviani allagarsianik atuarsinnaanermut qinnuteqarsinnaapput. Qinnuteqaat sullissivik.gl aqqutigalugu sulisup digitalimik atsiornertigut qunniunneqassaaq.

Imm. 6. Atuarsinnaanermut akuersissut imm. 1 aamma 2 malillugit inunnut imaluunniit inatsisit

naapertorlugit ingerlatsivinnut assigiinngitsunut tunniunneqarsinnaavoq. Taamaattoq atuarsinnaanermut akuersissutit amerlanerpaamik 10-t nalunaarsorneqarsinnaapput.

Imm. 7. Atuarsinnaanermut akuersissut Pisortani Digitalimik Allakkerinermi digitalimik nalunaarsorneqassaaq utertinneqarnissaatalu imaluunniit peerneqarnissaatalu tungaanut atuutissaaq.

§ 13. Atuarsinnaanermut akuersissummik tunniussisoq, Digitalimik Sullissinermut Aqutsisoqarfimmut saaffiginnilluni qaqugukkulluunniit akuersissut taanna utertissinnaavaa kinaassutsimullu uppersarsaat takutissallugu § 3-mi allaqqasut naapertorlugit, imaluunniit pineqartup nammineerluni Pisortani Digitalimik Allakkerinermut iseriarluni atsiorneq digitaliusoq atorlugu atuarsinnaanermut akuersissut peersinnaallugu. Inuup allap takkulluni pisinnaatinneqarnerminullu akuersissummik kiisalu kinaassutsimut uppersarsaammik § 3-mi allaqqasut naapertorlugit takutitsilluni atuarsinnaanermut akuersissut utertissinnaavaa. Utertitsineq Pisortani Digitalimik Allakkerinermi elektronikkikkut nalunaarsorneqassaaq.

Imm. 2. Atuarsinnaanermut akuersissummik tunineqartup digitalimik allakkerinermi atuarsinnaallunilu aaqqissuussisinnaavoq, matumani digitalimik mappit ilanngullugit.

Imm. 3. Atuarsinnaanermut akuersissummik tunineqartup atuarsinnaanermut akuersissut pineqartumut tunniunneqartoq naapertorlugu peersinnaavaa.

Imm. 4. Atuarsinnaanermut akuersissut inatsisit naapertorlugit ingerlatsivinnut tunniunneqartoq imaapportaaq, inatsisit naapertorlugit ingerlatsiviup toqqassavaa atuarsinnaanermut akuersissut inatsisit naapertorlugit ingerlatsivimmi inummumut imaluunniit inunnut Pisortani Digitalimik Allakkerinermi digitalimik allakkerivimmik akuerisaasutut atuisinnaasunut tamanut tunniutissanerlugu.

Imm. 5. Inuup atuarsinnaanermut akuersissut allamut tunniussimagaluarpaguluunniit, digitalimik allakkerineq atuarsinnaanermut akuersissummik tunniussisumut apuussimasutut isigineqassaaq. Inuup pineqartup digitalimik allakkerinermi atuarsinnaanermut akuersissut kimut tunniutissanerlugu nammineq akisussaaffigivaa.

Kapitali 7

Pisortani Digitalimik Allakkerinermi allagarsianik piiaaneq

§ 14. Pisortani Digitalimik Allakkerinermi allagarsiat inatsisit naapertorlugit ingerlatsivimmut takkuttut taamaallaat inatsisit naapertorlugit ingerlatsivimmit pineqartumit imaluunniit inatsisit naapertorlugit ingerlatsivimmi inuup Pisortani Digitalimik Allakkerinermi pisinnaatitaaffeqartumit, imaluunniit akiliisinnaajunnaarnermik nakkutilliisumit allalluunniit inatsisit naapertorlugit ingerlatsivimmik akiliisinnaajunnaarnermik suliaqarnermut atatillugu piginnaatitaasumit piaarneqarsinnaapput.

Imm. 2. Inatsisit naapertorlugit ingerlatsiviup Qitiusumik Suliffeqarfinnik Nalunaarsuiffimmi atorunnaartutut nalunaarsorneqarneranit ukiut qulit qaangiuppata ingerlatsiviup Pisortani Digitalimik Allakkerinermi allagarsiaasa imarisai piiarneqassapput, taamaattoq tak. imm. 6.

Imm. 3. Pisortani Digitalimik Allakkerinermi allagarsiat inummumut inuussutissarsiuteqarnermi attaveqaaqatigiinnermut atatillugu takkuttut pineqartumit taamaallaat peerneqarsinnaapput.

Imm. 4. §§ 1-3-mi malittarisassat malillugit Pisortani Digitalimik Allakkerinermut ilanngunnermit pisussaajunnaarsitsineq inuup digitalimik allakkerinerani allagarsianik piiaasoqassanngilaq.

Imm. 5. Inuup toqukkut qimagunnerani inuup digitalimik allakkerinerani allagarsiat imarisaasut

namminerisamik ukiut 5-it qaangiuppata peerneqassapput, taamaattoq tak. imm. 6.

Imm. 6. Inuup imaluunniit inatsisit naapertorlugit ingerlatsiviup assersuutigalugu pigisanik agguassisarnermut eqqartuussivikkut uppersarsinnaappagu inatsisit naapertorlugit ingerlatsiviup atorunnaarnerata kingorna imaluunniit toqukkut qimagussimasup atorunnaartup pii imaluunniit toqukkut qimagussimasooq pii sinnerlugit iliuuseqarsinnaalluni, kingusinnerusukkut imm. 2-mi aalangersarneqartut saniatigut piiaanissamut noqqaassuteqarsinnaavoq.

Imm. 7. Kingusinnerusukkut piiaanissamut noqqaassuteqarneq www.sullissivik.gl-ikkut imaluunniit Digitalimik Sullissinermut Aqutsisoqarfimmut allakkatigut allagaqarnikkut saqqummiunneqassaaq, aamma pigisanik agguassisarnermut eqqartuussivikkut imaluunniit allatigut uppersaait ilanngunneqassaaq, tak. imm. 6, kiisalu § 3-mi allaqqasut malillugit kinaassutsimut uppersaaitip assilinerat.

Kapitali 8

Atulersinneqarnera

§ 15. Nalunaarut atuutilerpoq 21. januar 2021.

Imm. 2. Pisussaajunnaarsitsinermut qinnuteqaat aamma atuarsinnaanermut qinnuteqaat atuutilerneraniit tunniunneqarsinnaapput.

§ 16. Inatsisit naapertorlugit ingerlatsiviit aamma inuussutissarsiuteqarnermi attaveqaatigiinneq pillugu suliaqartut Digitalimik Allakkerinermut pinngitsooratik ilanngunnissaat atuutilissaaq ulloq 1. marts 2021.

Namminersorlutik Oqartussat, ulloq 20. januar 2021

Katti Frederiksen

/

Karsten Peter Jensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut